



SESIÓN EXTRAORDINARIA CELEBRADA POLO PLENO DO CONCELLO
O DÍA 29 - OUTUBRO - 2007

ORDE DO DÍA

ASUNTO ÚNICO: XESTIÓNS REALIZADAS, EN RELACIÓN COS ACORDOS ADOPTADOS POLO PLENO DO CONCELLO O 29 DE SETEMBRO DE 2006, RELATIVOS Ó ESTUDIO INFORMATIVO DA VARIANTE DE REDONDELA, CLAVE: EI-2-PO-21, PUBLICADA NO BOE DO 07.08.06.

Na Casa do Concello de Redondela, sendo as vinte horas do día vintenoventa de outubro de dous mil sete, baixo a Presidencia do Sr. Alcalde, D. XAIME REI BARREIRO e a asistencia dos/as Sres./as Concelleiros/as: D. EDUARDO JOSÉ REGUERA OCAMPO, D. EMILIO GONZÁLEZ IGLESIAS, D^a. LAURA LAGO ALLER, D^a. MARIA ALBINA REBOREDO SURIS, D. MANUEL IGLESIAS CARRERA, D. CARLOS GONZÁLEZ FERNÁNDEZ, D^a. ISABEL CASTRO PIEDRAS, D^a. FRANCISCA CANAL GÓMEZ, D. JUAN TIZÓN CABALEIRO, D. JOSÉ ALBERTO PAZOS COUÑAGO, D. MIGUEL ANGEL ALVAREZ BALLESTEROS, D^a. HERMINDA QUELLE FERNÁNDEZ, DONA. MARIA LORENA LÓPEZ RODRÍGUEZ, D. CÁNDIDO VILABOA FIGUEROA, D^a. LAURA ALONSO GÓMEZ, D. XOSÉ CARLOS PAZOS DOCAMPO, D^a. MARÍA ANGELES BABARRO FERNÁNDEZ, D^a. ROSA MARIA COSTAS ESTÉVEZ, D. ALEJANDRO BASTOS FERNÁNDEZ, e D. BENIGNO GARCÍA-LUENGO MONTERO, tamén asistiu o Sr. Interventor Xeral do Concello D. MODESTO SOLLA SANZ, actuando como Secretaria a Secretaria da Corporación DONA. ANA BEGOÑA MERINO GIL, constitúese o Pleno do Concello, en sesión extraordinaria, conforme á convocatoria e de acordo coa Orde do Día.

INCIDENCIAS.-

Con carácter previo no tratamento dos asuntos incluídos na Orde do Día, a Corporación garda un minuto de silencio en lembranza das vítimas da violencia de xénero.-

A Presidencia declara aberta a sesión, en primeira convocatoria, procedéndose a trata-los puntos da Orde do Día.-

ASUNTO ÚNICO.- XESTIÓNS REALIZADAS, EN RELACIÓN COS ACORDOS ADOPTADOS POLO PLENO DO CONCELLO O 29 DE SETEMBRO DE 2006, RELATIVOS Ó ESTUDIO INFORMATIVO DA VARIANTE DE REDONDELA, CLAVE: EI-2-PO-21, PUBLICADA NO BOE DO 07.08.06.-

Pola concelleira señora Canal Gómez dáse lectura ao escrito polo que se solicitou a celebración da presente sesión extraordinaria do pleno do Concello, que dí así:

“Que, polo Sr. Concelleiro responsable de Urbanismo deste Concello, se dea conta no Pleno a celebrar, de todas as xestións realizadas polo Concello en relación cos acordos adoptados no Pleno celebrado o día 29 de setembro de 2006, (con traslado por fotocopia de todas as comunicacións dirixidas ós diversos



(Selo da Corporación)

(Sinatura do Presidente)

Follio N.º

Serie A N.º 1503903

organismos en virtude de aqueles acordos plenarios, e a cada un dos voceiros dos Grupos Municipais, que se facilitará coa convocatoria de dito pleno extraordinario.

Que, polo Sr. Concelleiro responsable de dita área, se dea conta en dito Pleno, da situación actual na que se atopa a chamada "Variante de Redondela", xa que nunha comunicación do Ministerio de Fomento, demarcación de Estradas do Estado en Galicia, se dirixe ó Concello indicándolle que debe preveer no Plen de Ordenación Municipal a EI.PO.21-Variante de Redondela.

Que medidas pretende adoptar o Concello, en relación con esta previsión última de incluír no Plan de Ordenación, a Variante de Redondela.

ANTECEDENTES.-

Na sesión extraordinaria do Pleno do Concello celebrada o pasado día 29 de setembro de 2006, a instancias do movemento veciñal coñecido como "Plataforma contra a Variante de Redondela", se adoptaron por unanimidade de todos os grupos políticos, entre outros, os seguintes acordos:

- a) Asumir como propias as alegacións presentadas polos veciños de Redondela no Rexistro Xeral deste Concello, que coincidan co punto primeiro. Ademais o Concello formulará, en prazo, as correspondentes alegacións contra dito proxecto nas que se fundamentará tecnicamente sobre os perxuízos económicos, medioambientais e sociais que a obra proposta ocasiona a Redondela. (Explique e aporte aos voceiros, as alegacións técnicas que se comprometeu a presentar o Concello).
- b) O Concello de Redondela, se persoará nos Procedementos administrativos en trámite, en orde a conseguir a anulación do proxecto mencionado, e no seu caso a impedir a execución das obras previstas no Estudo informativo de clave: EI-2-PO-21 "Estrada nacional 550. Variante de Redondela", Provincia de Pontevedra. (Explique o Sr. Concelleiro, que actuacións se realizaron con respecto a este punto).
- c) O Concello de Redondela, se compromete a ter puntualmente informada á Plataforma Veciñal, prestándolle incluso asistencia técnico xurídica con persoal do mesmo Concello de Redondela. (Comunicacións efectuadas á Plataforma por fotocopia, e se á mesma se lle deu traslado do informe do Ministerio de Fomento rexistrado no Concello con data de 10 de maio de 2007, onde basicamente se dí, que se deberá ter en conta no Plan de Ordenación Municipal a: EI-PO-21, Variante de Redondela).
- d) O Concello de Redondela, solicitará á Xunta de Galicia e á Deputación Provincial de Pontevedra que manifesten a súa oposición expresa e rotunda á obra proposta e prevista no citado Estudo-Variante de Redondela. (A este respecto, esta Voceira sendo Deputada Provincial solicitou do Pleno da Corporación Provincial o seu posicionamento contrario a este estudo, o que así se acordou en sesión de data 25 de outubro de 2006. ¿Qué fixo o Goberno Municipal en relación coa Xunta de Galicia?. Se aporte comunicación se a houbo.
- e) O Concello de Redondela, darátraslado deste acordo plenario ós seguintes organismos: Ministerio de Fomento, Demarcación de Estradas do Estado en Galicia, Cnsellería de Política Territorial, Obras Públicas e Transportes, así como á Deputación de Pontevedra. (Copia dos oficios pertinentes dirixidos a todos estes organismos e contestacións no seu caso).

Por todo o anteriormente exposto, vimos en solicitar a celebración de Pleno Extraordinario da Corporación Municipal, debendo sinalarse día e hora, así como adxuntar a documentación solicitada na convocatoria de dito Pleno."

INTERVENCIÓNS.-



O concelleiro señor González Iglesias di que cando se adoptaron os oportunos acordos polo pleno do Concello foron tramitados ante as administracións correspondentes. Indica que no expediente tamén figura un escrito do ministerio de Fomento no que xa se fala dun posible arquivo da cuestión e que isto non chega por arte de maxia senón despois dunha serie de xestións realizadas dende o Concello. Sinala que sempre se deu conta a todo o mundo, aínda que a voceira do PP confunde un informe ao PXOM co expediente das variantes e son cousas que non teñen na que ver, ao seu xuízo. Dí que ela mesma sabía que o PXOM non ía incluír a variante porque nin está aprobada nin o Concello está de acordo coa mesma, dado que se considera que é preciso dar unha solución ao tramo Redondela-Vigo, e conectalo coa autovía de Pontevedra-Vigo, autovía para a que puxeron dúas condicións: que non pase próxima á costa e que non afecte a ningún núcleo urbano de Redondela. Suliña que non van a permitir que se saque o tema da variante do seu proceso de arquivo e que foi precisamente a Deputación Provincial a que no seu intre informou o proxecto, inclinándose por unha das alternativas, sendo a voceira do PP a que presidía a comisión de medio ambiente. Admite que o pleno da Deputación rectificou isto dous meses despois e pensa que o da variante é un tema pechado e non paga a pena volver sobre o mesmo. Tamén indica que a voceira do PP se posicionou nun primeiro momento en contra da autovía de Pontevedra a Vigo e logo, cando lle chamaron á orde, tivo que desdecirse afirmando que non lle entenderan.

O concelleiro señor Bastos Fernández di que o 29 de setembro de 2006 se rexeitou totalmente a variante e que xa leva preguntando moitas veces no Concello se hai algo diso porque é unha cuestión moi importante e eles non se fían. Suliña que o informe da Demarcación de Estradas entrou non Concello o 10 de maio e a eles lles foi entregado o 10 de setembro.

O concelleiro señor Pazos Docampo sinala que non procede que este tema se utilice como unha batalla político-electoral xa que non se trata de algo anecdótico. Dí que o BNG prantexou as súas preguntas no Congreso dos Diputados e a resposta que obtiveron está na liña do afirmado polo voceiro socialista. Pide prudencia ao PP dado que foi o único partido que nalgún intre deu o visto bo á variante aínda que logo volveran atrás. Nembagantes indica que en relación aos orzamentos xerais do Estado para o ano 2008, o PP apresentou unha enmenda na que solicitan que se inclúa unha partida de 600.000 euros para a variante de Redondela, e que non é unha cousa que se estea inventando senón que figura no boletín do Senado, aportando a tal efecto unha copia para o expediente. Isto lle parece unha desvergonza e por iso volve a pedir prudencia.

A concelleira señora Canal Gómez di que o voceiro do BNG está a facer o mesmo do que se queixaba en relación ao señor González Iglesias cando estaba na oposición e non cobraba por adicación exclusiva. Lle parece que sómentes gobernan co obxectivo de cobrar os soldos polas adicacións exclusivas. Dí que o PP está na oposición e os que teñen que respostar son eles, que gobernan e que non deron conta dun informe de Fomento que chegou ao Concello o 14 de maio, en vísperas das eleccións, e do cal non se lle entregou unha copia ata hai uns días despois de que o concelleiro de urbanismo lles dixera pouco antes que o informe o tiña a secretaria baixo chave. Rememora que nunha xuntanza de novembro de 2005 co concelleiro de urbanismo, se lles presentaron as alternativas para a variante e foi o PP o que dixo que non estaban de acordo. Tamén di que o tema salíu a información pública en agosto de 2006 e non lles costa que se presentara polo Concello ningunha alegación. Suliña que non hai ningún documento no que se diga que o proxecto da variante está paralizado e indica que o pleno da Deputación o rexeitou. Dí que o Ministerio de Fomento é do PSOE e lle parece que o goberno do Concello ten actuado nesta cuestión de xeito negligente dado que a partida para a obra segue nos orzamentos e non lle consta que presentaran alegacións e considera que de acordo co prantexamento de Fomento o PXOM terá que incluír a variante que se atopa procedimentalmente "pendente de resolución".

O Alcalde pídlle que vaia rematando a súa intervención porque xa leva demasiado tempo.

A concelleira señora Canal Gómez queixase por que o Alcalde lle coarta a súa liberdade de expresión e reclama o seu dereito a pechar o turno de intervencións.

Suscítase o debate de se ao abeiro da normativa de aplicación é certo este último extremo en relación ao cal se produce á consulta á secretaria quen sinala que de acordo co artigo 94 do Regulamento de Organización, Funcionamento e Réxime Xurídico das Corporacións Locais (ROF) o que fai unha moción ou

(Selo da Corporación)

(Sinatura do Presidente)

Folio N.º



Serie A N.º 1503904

proposta ten dereito a pecha-las intervencións para, brevemente, ratificar ou modifica-la súa proposta. Nembargantes e tendo en conta que no presente pleno non se formulou concretamente ningunha proposta de acordo estima que deben prevalecer as facultades do Alcalde como director e moderador do debate para ordena-lo mesmo.

O concelleiro señor González Iglesias di que é absurdo prantexar un pleno extraordinario sen nengunha proposta de resolución e remitirse a xuntanzas do ano 2005 cando o certo é que o Concello acordou non incorporar ao PXOM ningún prantexamento de variante e iso é o que está claro. Tamén di que a voceira do PP confunde os partidos coas institucións, dado que o Ministerio de Fomento non é do PSOE.

O Sr. Alcalde di que dado que non hai proposta de acordo que votar e o tema está dabondo debatido, procede levantar a sesión sendo as vinte cincoenta horas da data fixada no encabezamento, en proba de todo o que, se estende a presente acta, que se inscribiu no Libro dende a volta do folio núm. 103 do Papel Timbrado da Comunidade Autónoma de Galicia, Serie A nº 1503902 ata o folio núm. 105, Serie A nº 1503904, de todo o que, como Secretario, DOU FE.-

O ALCALDE

XAIME REI BARREIRO

A SECRETARIA XERAL

ANA BEGOÑA MERINO GIL